



Na osnovu člana 9. i 25. Zakona o Agenciji za bankarstvo Federacije Bosne i Hercegovine ("Službene novine Federacije BiH", br. 9/96, 27/98, 20/00, 45/00, 58/02, 13/03, 19/03, 47/06, 59/06, 48/08, 34/12 i 77/12), člana 12. stav 1. i 2., člana 15. stav 1. i člana 95. Zakona o lizingu ("Službene novine Federacije BiH", br. 85/09, 39/09, 65/13 i 104/16) i člana 18. Statuta Agencije za bankarstvo Federacije BiH ("Službene novine Federacije BiH", broj: 42/04), Upravni odbor Agencije za bankarstvo Federacije Bosne i Hercegovine, na sjednici održanoj 24.07.2017. godine, donosi

**ODLUKU O IZMJENAMA I DOPUNAMA ODLUKE
O USLOVIMA I POSTUPKU ZA IZDAVANJE I ODUZIMANJE DOZVOLE ZA
OBAVLJANJE POSLOVA LIZINGA**

Član 1.

U članu 7. stav (1) tačka 1. Odluke o uslovima i postupku za izdavanje i oduzimanje dozvole za obavljanje poslova lizinga („Službene novine Federacije BiH“, br. 46/09 i 46/11) riječi „šest mjeseci“ zamjenjuju se riječima „godinu dana“. Iza riječi "lizinga" dodaje se zarez i sljedeći tekst:

"što podrazumijeva uplatu osnivačkog kapitala i registraciju lizing društva u nadležnom sudu, ispunjenje drugih zakonskih i općih organizacionih zahtjeva definiranih odredbama člana 60a. Zakona o lizingu, te otpočinjanje poslovnih aktivnosti zaključenjem ugovora o lizingu;"

Član 2.

U članu 7. stav (1) tačka 2. odluke riječi „šest mjeseci“ zamjenjuju se riječima „godinu dana, što podrazumijeva neobavljanje poslova iz djelatnosti lizinga propisanih odredbama Zakona“.

Član 3.

Iza člana 7. dodaje se novi član 7a. koji glasi:

"Član 7a.

- (1) Skupština lizing društva može donijeti odluku o prestanku poslovanja kao lizing društvo i izvršiti preregistraciju u drugo privredno društvo pod uslovom da u portfelju nema važećih ugovora o lizingu. Pod važećim ugovorima se podrazumijevaju lizing ugovori koji su u otplati i po kojima nije pokrenut proces naplate putem nadležnog suda.
- (2) Lizing društvo je u obavezi da u roku od 15 dana od usvajanja odluke o prestanku poslovanja kao lizing društvo izvijesti FBA i dostavi primjerak odluke skupštine lizing društva. Odluka o prestanku poslovanja kao lizing društvo je neopoziva i preregistraciji u drugo privredno društvo, te njen eventualni opoziv, nema pravno dejstvo na daljnje aktivnosti FBA.
- (3) Lizing društvo iz stava 1. ovog člana dužno je, prije upisa odluke o promjeni predmeta poslovanja u sudski registar, dobiti rješenje FBA o ukidanju dozvole za obavljanje poslova lizinga.
- (4) FBA će donijeti rješenje o ukidanju dozvole kada, uz druge uslove potrebne za prestanak poslovanja lizing društva utvrdi da su ispunjeni uslovi iz stava (1) ovog člana. FBA je ovlaštena da obavi kontrolu lizing društva sa ciljem provjere ispunjenja uslova za preregistraciju.

- (5) Ako lizing društvo donese odluku o prestanku poslovanja kao lizing društvo, a u portfelju ima važećih ugovora o lizingu i u roku od šest mjeseci nije na drugo lizing društvo prenijelo svoje lizing poslovanje, može se obratiti FBA za produženje roka na dodatnih šest mjeseci. Uz zahtjev je potrebno priložiti dokaze da su u prethodnom periodu poduzete adekvatne aktivnosti na ispunjenju uslova za preregistraciju. FBA će razmotriti opravdanost zahtjeva, te u slučaju opravdanosti istog izdati rješenje o produženju roka.
- (6) Ukoliko se lizing društvo ne obrati sa zahtjevom za produženje roka ili u okviru produženog roka ne ispuni uslove za preregistraciju, FBA će pokrenuti aktivnosti na oduzimanju dozvole. Lizing društvo ostaje pod nadzorom FBA sve do okončanja procesa preregistracije ili do pokretanja postupka likvidacije od strane nadležnog suda.
- (7) Lizing društvo iz stava (1) ovog člana može svoje lizing poslovanje prenijeti na drugo pravno lice registrovano za obavljanje poslova lizinga. Pravna lica koja učestvuju u tom postupku dužna su o toj namjeri u pisanoj formi obavijestiti FBA, obaviti prethodne konsultacije sa FBA, te dobiti saglasnost FBA za taj prijenos."

Član 4.

Ova odluka stupa na snagu osmog dana od dana objavljivanja u "Službenim novinama Federacije BiH".

Broj: U.O.-05-04/17
Sarajevo, 24.07.2017.godine

Predsjednica
Upravnog odbora

mr.sc. Ljerka Marić, dipl.ecc., s.r.